



Bilten Saveza općina i gradova Federacije Bosne i Hercegovine



Godina: XIX

Datum: 02.03.2022.

Broj: 279

USLUGE SAVEZA:

• PRAVNO SAVJETOVALIŠTE:

Selma Fišek, viši saradnik za pravna pitanja
selma@sogfbih.ba

• FINANSIJSKO SAVJETOVALIŠTE

Halko Basarić, viši saradnik za finansijska
pitanja
halko@sogfbih.ba

KORISNI LINKOVI ZA FONDVE EU:

www.southeast-europe.net
www.adriaticinnovationmap.eu
www.adrioninterreg.eu
www.europa.ba
www.cbibplus.eu
www.cbc.bih-mne.org
www.srb-bih.org
www.interreg-hr-ba-me2014-2020.eu
www.programmmed.eu
<https://tacso.eu/>
<https://evinfo.ba/en/>
www.balkanfund.org
<https://eacea.ec.europa.eu>
www.welcomeurope.com

ADRESA:

Musala br.5/1
71000 Sarajevo
Telefon: +387 33 216 502,
209 024, 209 120
fax: +387 33 552 810, 216 502
savez@sogfbih.ba

PREDsjedništvo SKUPŠTINE SAVEZA OPĆINA I GRADOVA FBiH PODRŽALO USPOSTAVLJANJE REVOLVING FONDA ZA PODRŠKU OPĆINAMA ZA APLICIRANJE NA PROJEKTE

Druga sjednica Predsjedništva Skupštine Saveza općina i gradova Federacije Bosne i Hercegovine održana je 24.02.2022. godine u Kiseljaku.

Predsjedništvo Saveza je ovom prilikom razmatralo brojna pitanja od značaja za jedinice lokalne samouprave kao što su aktivnosti na izradi novog Zakona o pripadnosti javnih prihoda u FBiH. Naime, Vlada FBiH je imenovala radnu grupu

za izradu metodologije pripadnosti javnih prihoda u FBiH koja će biti ugrađena u novi zakon, a u kojoj i Savez ima svog predstavnika.

Predsjedništvo Saveza je podržalo Nacrt Zakona o izmjenama i dopunama Zakona o principima lokalne samouprave u FBiH koji je pripremio Federalno ministarstvo pravde uz konstataciju da je potrebno raditi na izradi potrebnih cjelovitih izmjena ovog Zakona.

Predsjedništvo Saveza je podržalo inicijativu za izmjene Zakona o prodaji stanova na kojima postoji stanarsko pravo kojim je jedinicama lokalne samouprave, bez njihove saglasnosti, nametnuta obaveza da bivšim vlasnicima nacionalizovanih stanova, na njihov zahtjev, dodijele drugi zamjenski stan.

Predsjedništvo je takođe podržalo inicijativu za hitno rješavanje problema rasta cijena električne energije za komunalna preduzeća.

Na sjednici su prezentirani izvještaji sa sjednica skupštinskih komisija Saveza, i to: Komisije za ustavna i zakonodavna pitanja, Komisije za ekonomski razvoj općina i gradova i finansije, Komisije za međunarodne veze, saradnju i evropske integracije, te Komisije za izbor i imenovanja.

Članovi Predsjedništva su upoznati i sa zaključcima sa sastanka Mreže za javne finansije Saveza, održanog 16.02.2022. godine u Sarajevu, kojem su prisustvovali predstavnici iz više od 50 lokalnih zajednica iz FBiH.

Podržane su aktivnosti na uspostavljanju finansijskog mehanizma za podršku jedinicama lokalne samouprave – Revolving fonda za apliciranje na EU i međunarodne projekte, razvijenog kroz saradnju sa Vladom FBiH i Razvojn timer bankom FBiH.

U kontekstu mnogobrojnih pitanja vezanih za obaveznu vanjsku reviziju koju je općinama nametnuo novi Zakon o računovodstvu i reviziji, usvojen je zaključak da se od nadležnih vlasti traži odgoda primjene ovog Zakona za jedinice lokalne samouprave od godinu dana, kao i donošenje odgovarajućih podzakonskih akata.



Sa sjednice Predsjedništva, Kiseljak, 24.02.2022.

SAVEZ OPĆINA I GRADOVA FBiH DIO RADNE GRUPE ZA IZRADU METODOLOGIJE PRIPADNOSTI I RASPODJELE JAVNIH PRIHODA U FBiH



Bosna i Hercegovina Federacija Bosne i Hercegovina Vlada Federacije Bosne i Hercegovine

U cilju realizacije Zaključka Doma naroda FBiH od 14.10.2021. godine, Vlada FBiH je formirala Radnu grupu za izradu metodologije pripadnosti i raspodjele javnih prihoda u Federaciji BiH, sukladno ustavnim nadležnostima svih razina vlasti u FBiH, poštujući principe transparentnosti, pravičnosti i ravnopravnosti. Ova metodologija će biti temelj za izradu novog propisa o raspodjeli javnih prihoda u FBiH. Radnu grupu će sačinjavati nadležne komisije i odbori Parlamenta FBiH, predstavnici nadležnih kantonalnih ministarstava finansija, te predstavnici Saveza općina i gradova FBiH. U Radnu grupu je ispred Saveza općina i gradova FBiH imenovan Suad Huskić, načelnik Općine Tešanj.

Pomenutim Zaključkom se tražila izmjena jednog člana Zakona o pripadnosti javnih prihoda u FBiH, ali je Vlada FBiH je uvažila potrebu sveobuhvatne analize efekata primjene dosadašnjeg Zakona, te izrade nove metodologije pripadnosti i raspodjele javnih prihoda u FBiH. Postojeći Zakon je u primjeni već 15 godina, a za to vrijeme Savez na osnovu pripremljenih analiza i dostavljenih inicijativa članica Saveza upućivao više zahtjeva za izmjenu zakonskih rješenja u cilju unaprijeđenja finansijske pozicije jedinica lokalne samouprave. Ovo se prije svega odnosi na neizravnu otplatu vanjskog duga FBiH od strane jedinica lokalne samouprave kroz postojeći sistem raspodjele javnih prihoda u FBiH, kao i potrebu povećanja vertikalnog udjela općina i gradova u raspodjeli prihoda u FBiH. Radna grupa je održala prvi sastanak 15.02.2022., te se u narednom periodu očekuje intenziviranje aktivnosti kako bi proces pripreme metodologije bio okončan unutar šest mjeseci.

Sudjelovanje Saveza u radu Radne grupe je od iznimnog značaja, jer će interesi općina i gradova moći biti zastupljeni u samom procesu izrade metodologije, na način da se poštuju zakonski okvir za funkcioniranje lokalnog nivoa vlasti, ali i principi transparentnosti, pravičnosti i jednakosti.

Savez već niz godina ukazuje na potrebu povećanja procenta pripadnosti javnih prihoda za JLS. Sudjelovanje Saveza u radu Radne grupe je od iznimnog značaja, jer će interesi općina i gradova moći biti zastupljeni u samom procesu izrade metodologije

ODRŽANA 4. SJEDNICA KOMISIJE ZA EKONOMSKI RAZVOJ OPĆINA I GRADOVA I FINANSIJE

Na poziv načelnika Općine Tešanj Suada Huskića, u Tešnju je 01.02.2022. godine održana 4. sjednica Komisije za ekonomski razvoj općina i gradova i finansije Saveza općina i gradova FBiH. Pored članova Komisije, sjednici je također prisustvovao i predsjednik Predsjedništva Skupštine Saveza Hamdo Ejubović, direktorica Saveza općina i gradova Vesna Travljanin, kao i nadležni iz Službe za finansije Općine Tešanj.

Sjednica je imala tematski karakter, imajući u vidu da je Vlada FBiH pokrenula aktivnosti na formiranju Radne grupe za izradu metodologije pripadnosti i raspodjele javnih prihoda u FBiH. U Radnu grupu je ispred Saveza općina i gradova FBiH imenovan Huskić, te je Komisija u proširenom sastavu imala priliku da diskutira trenutno stanje općinskih finansija, odnosno usaglasi stavove članica Saveza po pitanju metodologije i principa raspodjele prihoda od indirektnih poreza.

Zaključeno je da, pored već identificiranih problema prenosa nadležnosti bez adekvatnih izvora finansiranja, kao i vraćanja vanjskog duga, postojeći sistem raspodjele kao i indikatori na kojima je zasnovan su u upotrebi već 15 godina. Komisija smatra da je potrebno iznaći nove principe i indikatore koji će realnije obuhvatiti rashodovne potrebe općina i gradova, ali i uzeti u obzir potrebu za ravnomjernim razvojem općina, kao i principom solidarnosti.



Sa sjednice Komisije, Tešanj, 1.02.2022.



Sa sjednice Komisije, Tešanj,
1.02.2022.

Savez je već ranije pripremio Analizu pripadnosti javnih prihoda jedinicama lokalne samouprave u Federaciji BiH, koja identifikira ključne izazove u lokalnim finansijama, prije svega indirektno vraćanje vanjskog duga od strane općina i gradova, ali i prijenos nadležnosti bez alociranja adekvatnih izvora prihoda. Općine i gradovi u FBiH generišu svega 2,9% vanjskog duga FBiH, ali kroz postojeći sistem raspodjele u kojem se otplata vanjskog duga vrši ukupno za cijelu FBiH, indirektno vraćaju vanjski dug i drugih nivoa vlasti. Analiza je pokazala i da bi trenutni udio lokalnog nivoa od 8,42% u vertikalnoj raspodjeli prihoda od indirektnih poreza trebalo povećati na 9,81%, kako bi općine i gradovi imali dostatan nivo prihoda, odnosno bili kompenzirani za indirektno vraćanje vanjskog duga FBiH.

Komisija je također razmatrala i implikacije Zakona o računovodstvu i reviziji, odnosno obavezne vanjske revizije, na funkcioniranje jedinica lokalne samouprave.

ODRŽANA DRUGA SJEDNICA KOMISIJE ZA USTAVNA I ZAKONODAVNA PITANJA



U Sarajevu je 10.02.2022. godine održana Druga sjednica Komisije za ustavna i zakonodavna pitanja Saveza općina i gradova FBiH.

Na sjednici je razmatran Nacrt Zakona o izmjeni Zakona o matičnim knjigama u FBiH. O razlozima za donošenje i aktivnostima na izradi ovog Zakona izvjestili su predstavnici Federalnog ministarstva unutrašnjih poslova koji su takođe istakli i dobru saradnju sa Savezom općina i gradova FBiH. Naglašeno je da se predloženim izmjenama vrši usklađivanje sa presudom Ustavnog suda FBiH kojom je utvrđeno da je Zakonom o matičnim knjigama povrijeđeno pravo na lokalnu samoupravu.

Komisija je razmatrala i inicijativu Udruge „Vaša prava BiH“ za izmjenu i dopunu Zakona o matičnim knjigama FBiH. Ovu inicijativu je na izjašnjenje Savezu uputio Odbor za pravdu i opću upravu Predstavničkog doma Parlamenta FBiH.

Komisija je podržala inicijativu Grada Mostara za izmjene Zakona o prodaji stanova na kojima postoji stanarsko pravo kojim je općinama i gradovima propisana obaveza da bivšem vlasniku nacionaliziranog stana, na njihov zahtjev, dodijele drugi zamjenski stan. Istaknuto je da je ovo samo jedan od zakonskih propisa kojima je nametnuta obaveza jedinicama lokalne samouprave od strane viših nivoa vlasti, a što nije praćeno prenosom finansijskih sredstava za izvršavanje obaveza.

Zaključke sjednice Komisije za ustavna i zakonodavna pitanja će razmatrati Predsjedništvo Saveza općina i gradova FBiH na sjednici koja će se održati 24.02.2022. godine.

*Komisija je podržala
inicijativu Grada
Mostara za izmjene
Zakona o prodaji
stanova na kojima
postoji stanarsko pravo*



ODRŽAN TREĆI SASTANAK MREŽE ZA JAVNE FINANSIJE/FINANSIJE SAVEZA OPĆINA I GRADOVA FBiH

U Sarajevu je 16.02.2022. godine održan Treći sastanak Mreže za javne financije/finansije Saveza općina i gradova FBiH, uz prisustvo 60 pomoćnika načelnika/gradonačelnika za financije, gostiju i predstavnika medija. Ovaj sastanak Mreže iskorišten je za konsultacije i donošenje stava Mreže povodom tri aktualne teme iz područja javnih finansija:

- Početak procesa izrade metodologije pripadnosti i raspodjele javnih prihoda u FBiH i učešće Saveza u Radnoj grupi za izradu metodologije pripadnosti i raspodjele javnih prihoda u FBiH
- Predstavljanje finansijskog mehanizma za podršku jedinicama lokalne samouprave pri apliciranju na IPA i druge fondove, razvijenog u saradnji sa Vladom FBiH
- Implikacije iz novog Zakona o računovodstvu FBiH na reviziju lokalnog sektora, odnosno obaveza nabavke godišnje vanjske revizije.



Članovi Mreže za javne financije/finansije smatraju da je postojeći Zakon o pripadnosti javnih prihoda u FBiH zastario, jer je u proteklih 15 godina došlo do značajnih promjena u društvenim i ekonomskim okolnostima, a sam zakon djelimično koristi historijske podatke iz 2006. godine koji su zastarjeli i nerelevantni. Potrebno je usvojiti novi propis koji će koristiti transparentne i lako dostupne podatke za izračun raspodjele i pripadnosti prihoda, uz poštivanje kriterija pravičnosti i ravnomjernog razvoja. Jedan od kriterija za raspodjelu treba biti broj stanovnika, jer je to dobra aproksimacija za rashodovne potrebe jedinica lokalne samouprave, ali dopunjen sa drugim kriterijima. Pored raspodjele prihoda od indirektnih poreza, potrebno je povećati udio općina i gradova i porezu na dohodak sa sadašnjih minimalnih 34,46% na 50%, imajući u vidu prenesene dodatne nadležnosti jedinicama lokalne samouprave. Prilikom izrade novog propisa o pripadnosti i raspodjeli prihoda u FBiH, potrebno je voditi računa da ne dođe do pada prihoda malih općina, kako se ne bi dovelo u pitanje obavljanje dodijeljenih nadležnosti od strane malih općina. Potrebno je i regulirati otplatu vanjskog duga na način da svaki nivo vlasti otplaćuje dug koji je i generirao (u skladu sa Zakonom o budžetima), te da ne dolazi do anomalije u raspodjeli prihoda između nivoa vlasti u FBiH na način da lokalni nivo vlasti neizravno otplaćuje dug generiran od viših nivoa vlasti i javnih preduzeća.

Članovi Mreže za javne finansije također podržavaju osnivanje finansijskog mehanizma za podršku općinama i gradovima pri apliciranju na IPA projekte. Potrebno je nastaviti dalje pregovore sa Vladom FBiH, odnosno Ministarstvom finansija, kako bi se konkretizirala ponuda koje će ovaj mehanizam imati, u smislu uslova kreditiranja, grantova za pojedine kategorije općina i gradova, kao i visine sredstava u samom mehanizmu.

Učesnici sastanka su saglasni da je vanjska revizija lokalnog nivoa potrebna i poželjna, ali su stava da istu treba obavljati Ured za reviziju institucija u FBiH, kako bi pristup reviziji mogao biti harmoniziran za sve jedinice lokalne samouprave. Također, pomoćnici načelnika za finansije traže da se donesu jedinstveni i usaglašeni kriteriji za nabavku vanjske revizije, kako ne bi dolazilo do različitih pristupa u odabiru, i posljedično različitog kvaliteta obavljenih revizija.

Održavanje Mreže za javne finansije/finansije SOGFBIH je aktivnost u sklopu projekta „Jačanje saveza općina i gradova u BiH“, a koju podržavaju Vlada Švedske i Vlada Švicarske.

TV prilog sa održanog sastanka možete pogledati na sljedećem linku:

<https://youtu.be/mVGNSELiYiA>

Članovi Mreže za javne financije/finansije smatraju da je potrebno usvojiti novi Zakon o pripadnosti javnih prihoda u FBiH koji će koristiti transparentne i lako dostupne podatke za izračun raspodjele i pripadnosti prihoda, uz poštivanje kriterija pravičnosti i ravnomjernog razvoja.

USVOJEN PROGRAM ZA UNAPREĐENJE VODNIH USLUGA U FBiH

Vlada FBiH je na 303. sjednici koja je održana 17.02.2022. godine donijela Odluku o usvajanju Programa za unapređenje vodnih usluga u Federaciji Bosne i Hercegovine i korištenje najavljene finansijske i tehničke podrške.



Sa sjednice Vlade FBiH

Program se sastoji od tri segmenta koja se odnose na planiranje budućih aktivnosti čija realizacija treba da doprinese otklanjanju nedostataka u regulatornom i institucionalnom okviru sektora vodnih usluga, kao i finansiranju ovog sektora.

Kako stoji u obrazloženju Federalnog ministarstva poljoprivrede, vodoprivrede i šumarstva, uprkos velikim ulaganjima međunarodnih finansijskih institucija i bilateralnih donatora u posljednjih deset godina, sektor vodnih usluga u FBiH susreće se sa sve većim izazovima. Procijenjeno je da kvaliteta vodnih usluga bilježi negativan trend, najviše zbog smanjenja kvaliteta vode za piće uzrokovanog zagađenjima, povećanjem curenja i gubitaka u vodovodnoj mreži (posljedično visoke vrijednosti neprihodovane vode, prosjek 59 posto, a dostiže i više od 70 posto), zbog neodgovarajućeg investicijskog održavanja, te posljedičnom pojavom redukcija u redovnom snabdijevanju korisnika usluga. Vodovodna komunalna preduzeća ne ostvaruju dovoljno prihoda da bi bila samoodrživa, a prosječni nivoi prihoda od izvršenih vodnih usluga ne pokrivaju troškove rada i održavanja.

Probleme u sektoru pružanja vodnih usluga u BiH prepoznalo je i nadležno federalno ministarstvo, o čemu je informisalo i Vladu FBiH koja ga je zadužila da uspostavi interresornu Radnu grupu i koordinira njen rad uz podršku međunarodnih razvojnih partnera. Zadatak ove grupe je bio izrada Programa za unapređenje vodnih usluga u FBiH i korištenje najavljene finansijske i tehničke podrške. Tehnička pomoć Radnoj grupi da ispuni zadatak Vlade FBiH je omogućena kroz Projekat općinskog okolišnog upravljanja (MEG 2), koji zajednički finansiraju Vlada Švicarske, Švedska i Vlada Češke Republike, a implementira Razvojni program Ujedinjenih nacija (UNDP) u BiH.

Radna grupa je procijenila nedostatke u postojećem regulatornom okviru sektora koji su doveli do izazova, te usaglasila odgovarajuća rješenja za unapređenje postojećih i/ili izradu novih propisa (npr. novog zakona o vodnim uslugama u FBiH). Programom su predviđene ključne aktivnosti koje trebaju da dovedu do boljeg funkcionisanja institucija iz sektora vodnih usluga, prvenstveno vodovodnih komunalnih preduzeća, kao i aktivnosti koje trebaju doprinijeti pravilnijem i racionalnijem planiranju izrade i provođenja projekata iz oblasti vodnih usluga, kao i usklađivanju s propisima EU u ovoj oblasti.

Uvid u sadržaj Programa bio je omogućen i u okviru provedenih javnih konsultacija, a njegovo usvajanje i provedba jasno su postavljeni kao preduslov koji nadležni organi na svim nivoima vlasti, ne samo u Federaciji BiH, nego i u BiH, trebaju ispuniti za osiguranje dalje finansijske podrške međunarodnih razvojnih partnera za modernizaciju i reformu vodnih usluga.

ŠEST OPĆINA U FBiH DOBILLO STATUS GRADA

Delegati u Parlamentu Federacije Bosne i Hercegovine su na sjednici održanoj 17.02.2022. godine izglasali da šest općina postanu gradovi, i to: Konjic, Stolac, Zavidovići, Orašje, Bosanska Krupa i Lukavac.



Da bi općina postala grad, potrebno je da ispunjava jedan od tri uslova propisana Zakonom o principima lokalne samouprave u Federaciji Bosne i Hercegovine, i to: 1. da ima najmanje 30.000 stanovnika, odnosno u čijem gradskom središtu kao zaokruženom urbanom području živi najmanje 10.000 stanovnika, 2. da predstavlja sjedište kantona ili 3. da ima poseban historijski i kulturni značaj.

Također, gradom se može postati i na osnovu sporazuma o udruživanju dviju ili više općina, nakon čega se donosi federalni zakon o uspostavi grada.

Nakon donošenja ovog zakona u Federaciji Bosne i Hercegovine ima 22 grada i 58 općina.

PODRŠKA RADU UDRUŽENJA „I“ IZ KONJICA I „NAŠE SUNCE“ IZ VISOKOG U PREVAZILAŽENJU POTEŠKOĆA IZAZVANIH PANDEMIJOM COVID-19



Dodjela opreme Udruženju „i“ iz Konjica

U sklopu projekta „Jačanje lokalnih kapaciteta za implementaciju Agende 2030 i principa Nikoga ne zapostaviti“, Savez općina i gradova Federacije Bosne i Hercegovine je 26. januara i 21. februara 2022. godine u saradnji s Općinom Konjic i Gradom Visoko uručio vrijednu donaciju Udruženju djece, roditelja i omladine sa cerebralnom paralizom i ostalim teškoćama u razvoju „i“ Konjic i Udruženju roditelja/staratelja i prijatelja djece sa posebnim potrebama i korisnika dnevnog centra

Udruženje „i“ aktivno djeluje dvadeset godina i okuplja roditelje djece i omladine sa teškoćama u razvoju.

„Naše sunce“ sa sjedištem u Visokom.

Udruženje „i“ aktivno djeluje dvadeset godina i okuplja roditelje djece i omladine sa teškoćama u razvoju. Kroz svoje aktivnosti, Udruženje se zalaže za poboljšanje kvalitete života djece i mladih sa poteškoćama u razvoju.

Ovom prilikom udruženjima su dodijeljeni tableti, laptop, kuhinjski aparati, zaštitna oprema (maske, rukavice, dezinfekcijska sredstva) i brojne edukativne i društvene igre.

Načelnik Osman Čatić je istakao da Općina Konjic pruža kontinuiranu podršku radu Udruženja „i“ i planira aktivnosti koje će dalje unaprijediti rad Udruženja.



Dodjela opreme Udruženju „Naše sunce“ iz Visokog

Projekat se provodi uz podršku Mreže asocijacija lokalnih vlasti jugoistočne Evrope - NALAS i Njemačkog društva za međunarodnu saradnju - GIZ. Cilj projekta je pružanje podrške i pomoći najugroženijim grupama stanovništva u Federaciji Bosne i Hercegovine.

Projekat se provodi uz podršku Mreže asocijacija lokalnih vlasti jugoistočne Evrope - NALAS i Njemačkog društva za međunarodnu saradnju - GIZ. Cilj projekta je pružanje podrške i pomoći najugroženijim grupama stanovništva u Federaciji Bosne i Hercegovine.

ODRŽANA OBUKA NA TEMU: „RAZVOJ KOMPETENCIJA IZABRANIH ZVANIČNIKA I UPOSLENIKA U JLS ZA USLUGE VODOSNABDIJEVANJA, ODVODNJE I PREČIŠĆAVANJA OTPADNIH VODA“

Savez općina i gradova Federacije Bosne i Hercegovine u sklopu Projekta „Regionalna mreža za razvoj kapaciteta za usluge vodosnabdijevanja i otpadnih voda na Zapadnom Balkanu“ (RCDN) u ponedjeljak, 14. februara 2022. godine u Goraždu, održao je obuku na temu: „Razvoj kompetencija izabranih zvaničnika i uposlenika u jedinicama lokalne samouprave za usluge vodosnabdijevanja, odvodnje i prečišćavanja otpadnih voda“.

Učešće u obuci su uzeli vijećnici i državni službenici općina sa područja Bosansko-podrinjskog kantona Goražde i uposlenici javnih komunalnih preduzeća.

Cilj obuke je bio da se učesnici upoznaju s pravnim okvirom lokalne samouprave u sektoru vodnih usluga kako bi bolje razumjeli svoju ulogu i odgovornost, da razumiju važnost i potrebe za poboljšanjem organizacije pružanja vodnih usluga na nivou jedinica lokalne samouprave (općine i gradovi), kao i da zajednički razvijaju svoje kompetencije i na taj način osiguraju kolaborativni pristup pružanju vodnih usluga na lokalnom nivou.



Obuku su vodili Amra Hamzić, šef Odsjeka za internu reviziju Grada Tuzla, Amer Halilović, direktor JKP "Radnik" d.o.o. Zavidovići i Muamer Hodžić, edukator Saveza.



Sa obuke održane u Gorazdu, 14.2.2022.

Teme koje je obuka obuhvatila su opći aspekti vodnih usluga, upravljanje imovinom i ljudskim resursima, finansiranje vodnih usluga i tarifna politika.

Projekat u okviru kojeg se održava obuka usmjeren je ka povećanju efektivnosti i efikasnosti javnih komunalnih preduzeća iz oblasti vodosnabdijevanja na Zapadnom Balkanu, dajući doprinos boljem pružanju usluga s ciljem povećanja broja stanovništva koje ima pristup uslugama pitke vode i odvodnje, te da bi se zadovoljila pravna stečevina EU (Acquis Communautaire) za okoliš.

Projekat zajednički finansiraju Švajcarski državni sekretarijat za ekonomske poslove (SECO) i Savezno ministarstvo za ekonomsku saradnju i razvoj Njemačke (BMZ), a realizira se kroz GlZ projekat "Otvoreni regionalni fond za jugoistočnu Evropu - modernizacija općinskih usluga" (ORF MMS)".

SAVEZ OPĆINA I GRADOVA FBiH ODRŽAO OBUKU ZA VIJEĆNIKE U BIHAĆU

ReLOaD
Regionalni program lokalne demokratije na Zapadnom Balkanu

Savez općina i gradova Federacije Bosne i Hercegovine u okviru projekta „Podrška razvoju uslužno orijentisane lokalne samouprave u Federaciji Bosne i Hercegovine“, 9. februara 2022. godine u Bihaću održao je obuku na temu: "Transparentno finansiranje organizacija civilnog društva iz budžeta jedinica lokalne samouprave". U toku marta obuke će se održati još u: Novom Sarajevu, Prozor - Rami i Mostaru.



Sa obuke održane u Bihaću, 9.2.2022.

Obuku u Bihaću vodio je dr.sci Muamer Hodžić.

Cilj obuke je bio upoznati vijećnike sa važnošću i prednostima transparentnog finansiranja OCD iz općinskog/gradskog budžeta, kao i predstaviti ulogu općinskih/gradskih vijeća u planiranju i dodjeli sredstava OCD.

Modul obuke je pripremljen u okviru ranije faze Regionalnog programa lokalne demokratije na Zapadnom Balkanu (ReLOaD) koji finansira Evropska unija (EU) a sprovodi Razvojni program Ujedinjenih nacija (UNDP). Aktivnosti projekta „Podrška razvoju uslužno orijentisane lokalne samouprave u Federaciji Bosne i Hercegovine" naslanjaju se na projekat ReLOaD2.

NAJAVA OBILJEŽAVANJA DANA OPĆINA / GRADOVA ZA MJESEC MART / OŽUJAK



06. mart/ožujak - Dan Općine Hadžići. Taj dan se obilježava kao znak sjećanja na 6. mart 1996. godine, kada je izvršena reintegracija dijelova općine Hadžići koji su bili okupirani tokom agresije na Bosnu i Hercegovinu.

10. mart/ožujak - Dan Općine Doboj Istok. Ovaj datum je izabran jer je na taj dan 1998. godine stupio na snagu Zakon o konstituiranju novih općina u FBiH i izmjeni područja općina podjeljenih međuentitetskom i međikantonalnom / međuzupanijskom crtom ("Sl. novine FBiH", br. 6/98) kojim je formirana Općina Doboj Istok.

10. mart/ožujak - Dan Općine Teočak. Ovaj datum je izabran jer je na taj dan 1998. godine stupio na snagu Zakon o konstituiranju novih općina u FBiH i izmjeni područja općina podjeljenih međuentitetskom i međikantonalnom / međužupanijskom crtom ("Sl. novine FBiH", br. 6/98) kojim je formirana Općina Teočak.



12. mart/ožujak - Dan Općine Ilidža. 12. marta 1996. godine, provodeći odredbe Dejtonskog mirovnog sporazuma, realizirana je mirna reintegracija područja općine Ilidža.



15. mart/ožujak - Dan Općine Dobretići.

17. mart/ožujak - Dan Općine Trnovo. Na ovaj dan 1996. godine izvršena je reintegracija područja općine Trnovo.



18. mart/ožujak - Dan Općine Fojnica. Ovaj datum je uzet za obilježavanje Dana Općine jer se u dokumentima dubrovačkih trgovaca na taj dan 1365. godine prvi put spominje grad Fojnica.



18. mart/ožujak - Dan Općine Sapna. Ovaj dan je uzet za obilježavanje Dana Općine zato što je tog dana 1998. godine održana prva sjednica Općinskog vijeća novoformirane Općine Sapna.



19. mart/ožujak - Dan Općine Foča-Ustikolina. Na ovaj dan 1996. godine izvršena je reintegracija dijela područja općine.



20. mart/ožujak - Dan Grada Zenica. Na taj dan 1436. godine Zenica je prvi put spomenuta u dokumentu kojim se dubrovačkim trgovcima omogućava slobodno kretanje i poslovanje na području Bosne.



21. mart/ožujak - Dan Općine Dobojug je 21. mart, kada je 1998. godine održana prva Konstituirajuća sjednica Općinskog vijeća nakon proglašenja - uspostavljanja novih općina. Također, na ovaj dan 1993. godine Armija RBiH je zaustavila veliku neprijateljsku ofanzivu u Bici na Karušama, tzv. tenkovaška bitka u kojoj su jedinice 203. Slavne motorizovane brigade ARBiH "Doboj-Bosna" uništili osam tenkova i tri transportera bivše JNA, odn. vojske tzv. RS-a.



21. mart/ožujak - Dan Općine Travnik.



Gledajte Savez općina i gradova
Federacije Bosne i Hercegovine na



Poštovani čitaoci,

putem ovog biltena pružamo Vam mogućnost da se informišete o aktivnostima Saveza, o bitnim dešavanjima u općinama i gradovima, aktivnostima naših partnera, institucija vlasti, kao i o razmjeni najboljih iskustava i praksi.

Na ovaj način pružamo informacije o održanim sjednicama organa i tijela Saveza, konferencijama, seminarima, radionicama, okruglim stolovima, javnim raspravama, projektnim aktivnostima i sl.

Ukoliko želite da se prijavite za primanje ovog biltena možete to učiniti tako što ćete poslati e-mail na: dino@sogfbih.ba; ili putem popunjavanja forme na našoj web stranici.

Molimo vas da informacije o našem biltenu prosljedite svima u vašoj i susjednim JLS i drugim zainteresiranim.

Ukoliko želite da objavite neke od vaših novosti, iskoristite bilten Saveza koji je brz i efikasan način komuniciranja.

Sa zadovoljstvom očekujemo vaše komentare, sugestije ili primjedbe.